

Wáraga bi Páwulo eké zí 'yì ga
bi simi
Phílípoyì
ní
Ledre gi ro búkù bi Phílipo
ní

Gara bi Phílípoyì ní ni simi Mekedoníya bi ni mongú gara 'bi káṅgá bi Gírìsì mi'dí do ngelì ní. Simi Moko 'bi 'Yìmikása e kápita 16 Páwulo uku kóo ledre 'bi Lomo zí 'yì e íri zía kpá óto dosì kanísa zí 'yì e íri. Nda gi do kací tú'dù simìbi, do kóo ónzó Páwulo simi sígìnjì, zí 'yì 'bi Kírésìto ga bi simi Phílipo íri ní kása késì sáká wo kíe. Gi zí kényì nées zí Páwulo eké ledre ba kása zíye mbófo yée kíe.

Zía kpá úku ledre zíye simi ledre bi eké ba kídí nées Páwulo, nées eré ené ngìrì umbu wá. Nées uku ba wo zíye idíní tóro ngbúó simi ledre 'bi Lomo bi ṅgunṅuní ní simi bi ngíti géyì 'yì e niyí karanées go ndìsì méngì láráye ní. Páwulo ili 'yì 'bi Kírésìto ga gére nées idíní ndìsì 'búó'bù royé mi'búó'bù káa zí 'bi Kírésìto ní. Zía úku andá ledre zíye kídí ledre 'bi Kírésìto bi ṅgunṅuní zíye ídíye go éyì kíe'do kí kírésìto ní ni tákpásílì 'bi Lomo zíye. Gi zí kényì nées ndaní lódù kací 'yì 'dódo ledre ga bi yì eyé 'yì ranga e ndìsìní úku ledre kídí 'yì e idíní lódù kací toso miméngì ledre 'bi Lomo bi kací ondù 'bi Yúda e ní wá.

¹ Sée 'yì ga bi simi gara bi Phílípoyì, ngúngusé ledre 'bi Kírésìto Yésu Ngére ezé ní, máa Páwulo kí Timatiyo ezemá 'yì moko 'bi Kírésìto Yésu.

Máéké ledre ba máa zíse kí manda esé ga bi íri ní, nda kpá kí 'yì ga bi do kacíye ní.

² 'Buzé Lomo kí Kírésìto Yésu Ngére ezé idíní ówo ledre kíse, zíye méngì bilámá ledre zíse.

Páwulo i'bí mbófo éyì zí Lomo

³ Mándìsì sómù ledresé kací kadra mbá, zíma ndìsímá kí mbófo Lomo gì rosé. ⁴ Ndaá kpá lá duù wo née wá, mándìsì ini ini zí Lomo kí rokinyi do mimbé'demá gì rosé, ⁵ gì zía í'bísé rosé go kíngaya ndìsì sáká máa gì ro zí bilámá ledre 'bi Kírésìto bi mándìsì méngì a ní ngbóró tátá roné fú 'dá'dá. Tónósé kóo sáká máa go kú geré gì simi mizefì ógù kóo máógù zíse simi Phílípoyì íri ní. ⁶ Gì zí keyì née, máówo go kídí bilámá ledre bi Lomo oto do mimbé'desé ásé go ndìsì méngì ledre e kíe kenée née, utúasá ídí lá gbékpìne wá. Wo Lomo ni ndìsì í'bí roko'bu zíse, gì ro zíse ndìsìsé méngì bilámá ledre ga gére née kíe fú kenée ndéréógùnè gì simi sìnđì kadra bi karanée Kírésìto Yésu ni ndá'baógù simi a ní.

⁷ Utúasá miútúasá zíma kpá óto 'búse gì zía bi ótosé 'búma go gbála ní. Ótoómosé máa simi bi mááyí ndìsì úkulúgu ledre kací ndu'yú 'bi 'yì e kídí ledre 'bi Kírésìto ni ma'díi, kpá simi bi onzóní máa simi sígìnì gì ro moko 'bi Kírésìto ní óyósé sogosé zíma wá. Ndìsìsé kpá fú tóro ngbúó sogomá kí sáká máa do tų'dų mısı'di e.

⁸ Gì zí keyì née ní, Lomo owo go bilámáne kídí

máoto 'búse go kí mimbé'demá kǐé'do káa zǐ bǐ Kírésito Yésu oto 'búze ní.

⁹ Ba sí ledre bǐ mǎndǐsǐ ini ini zǐa, idí sáká sée zǐse ndǐsǐsé óto 'búse kǐ lafúse e gǐ ro zǐ cíyí ledre ené idíne simisé ngǐrǐ, zǐse ówoyéme ledre ené nda za kǐngaya gǐ zǐa ní, ¹⁰ gǐ ro zǐse ówo mbigí ledre 'bǐ Lomo bilámáne kpá gǐ ro zǐse idísé 'yǐ ga bǐ lúyú ledre ndaá royé wá, ndéréoguné gǐ simi sǐndǐ kadra bǐ karanée Kírésito Yésu ni ndá'baógu simi a ní. ¹¹ Togú ndǐsǐsé tǐ go ndǐsǐ méngǐ ledre ga bǐ utúasání miútúásá ní do komo Lomo kǐ 'yǐma'dí e simi roko'bú 'bǐ Kírésito Yésu ndéré kǐe fú kenée 'dá'dá yá, ni óto 'yǐ e zǐye ndǐsǐyé í'bǐ mbófo éyǐ zǐ Lomo kǐngaya.

Moko 'bǐ Kírésito idí ngbóro

¹² Owú 'bǐ Babá e, málli zǐse ówo a kídí mióonzó máa bǐ simi sígǐnǐ ní, líkpí misi'di go zǐ bilámá ledre 'bǐ Kírésito ngbóro tátá roné 'dá'dá. ¹³ Ndaá 'bǐ ené miótoécǐ ledre wá, asikǐri ga bǐ yáa kpá kǐ ngítǐ géyǐ mingburoko 'yǐ e owoní go mbá kídí onzóní máa simi sígǐnǐ ba gǐ zǐa bǐ mǎndǐsǐ méngǐ moko 'bǐ Kírésito ní. ¹⁴ Gǐ zǐa bǐ onzóní máa simi sígǐnǐ ní, zǐ Lomo í'bǐ roko'bú zǐ tú'dú ngítǐ géyǐ 'yǐ ga bǐ 'bǐ Ngére Yésu ní, zǐye ndǐsǐyé úku bilámá ledre ené zǐ 'yǐ e nda za kǐ roko'búyé, gǐ zǐa ngǐrǐ ndaá lolu royé wá.

¹⁵ Ngítǐ géyǐ 'yǐ e ndǐsǐnǐ 'bǐ eyé méngǐ moko 'bǐ Kírésito ma'dáa kǐ bisinyí mimbé'deyé gǐ zǐa ilínǐ gǐ ro zǐ 'yǐ e ndǐsǐyé mbófoyé, ngítǐ géyǐ mengínǐ 'bǐ eyé kǐ bilámá mimbé'deyé. ¹⁶ Yée ga bǐ ukuní 'bǐ eyé ledre ma'dáa kǐ bilámá mimbé'deyé kǐ

'búne ní, gí zía owoní go kídí onzóní máa simi sígìní gí zía bì mándìsì úku yéme bilámá ledre gí ro Kírésìto ní. ¹⁷ Yée ga bì ndìsìní úku ledre 'bì Kírésìto kí bisinyí mimbé'deyé née, gí zía bì iliní 'bì eyé zíma ídíma kí lerí do mimbé'demá simi sígìní yáa ní. ¹⁸ Yée ga bì ukuní 'bì eyé kí bisinyí mimbé'deyé, kí yée ga bì ukuní 'bì eyé kí bilámá mimbé'deyé ní, ledre ga gére née ata ené komo wá, mááyí kí rokinyi gí zía moko 'bì Kírésìto ni mindéréne 'dá'dá.

Gí zí ledre ga gére née mááyí kpá fú ídí kí rokinyi, ¹⁹ gí zía máówo bú kídí ini bì ndìsìsé ini a zí Lomo gí romá ní, Lomo ni úwú a, karanée niyí 'dí'biógú máa gí simi sígìní simi roko'bu 'bì 'Dówú Lomo bì Kírésìto Yésu kasa ní. ²⁰ Ba ledre bì mándìsì óto komomá gí roa ní, dokuwu mengi máa wá. Máílí í'bí romá ndìsì méngi moko 'bì Kírésìto za kí sómù ledre amá mbá. Togú ídí tridri, togú mbú umbu yá, mááyí nzíyímá gí roa. ²¹ Mongú sómù ledre amá cakaba òwú ndìsì méngi moko 'bì Kírésìto. Togú ufuní mbú máa gí zía bì mándìsì méngi moko zía ní yá, mengi éyí wá, kasaluguní née máa 'diya zí Kírésìto ma'dáa. ²² Togú umbu 'di'bi aka máa wá, ni kpá bilámáne zíma aka 'dódo yata ledre 'bì Kírésìto zía ndìsìné sáká sée. Máówo wá wo be 'di ni miútúásáne. ²³ Ledre e niyí bo gbre mbá gí romá. Mongú a ni wo bì utúasá miútúasá zíma úyúmá gí ro zíma ndá'bamá zí Kírésìto Yésu ní. ²⁴ Nda lá gí rosé gí ro zíma 'dódo yata ledre 'bì Kírésìto zise, utúasá miútúasá zíma aka ídíma fú kí komomá. ²⁵ Gí zí kényi née máówo

bú bilámáne kídí, Lomo ni yómo máa gi simi 'do'dó bi mááyí simi a ba máúyu wá, gi ro zíma 'dódo ledre ené zise gi do bi zise ɳgúngu a za kí mimbé'desé mbá, zise ndịsị ídise kí rokinyi. ²⁶ Togú luguoguní máa gi simi sịgini go, simi bi mááyí ógu zise íri ní, áse ídí mbá kí mongú rokinyi kí ndịsị í'bí mbófo éyí zí Kírésìto Yésu gi romá.

²⁷ Abú ledre e niyí kí méngi máa yá, mindịsịsé idí idí fú 'bi 'yi ga bi 'bi Kírésìto ní, gi ro zí 'yi e ndịsịyé óto úndru bilámá ledre ené bi ndịsịsé 'dódo a née. Togú máógu go lúrúsé e togú máógu wá, mááyí kpá fú úwú a kídí mindịsịsé ni kịé'do tí 'yi ga bi 'bi Kírésìto ní, gi ro zí moko ené ngbóróne. ²⁸ Togú 'yi ga bi niyí okó ro Kírésìto ní ayíní ndịsị úkucáyi sée yá, ndásé éré ngiri gi zíye wá, gi ro zí 'yi e ówo a kídí Lomo yomo sée ne, ni 'dó'do yée gi rosé. ²⁹ Bilámá ledre bi Lomo yeme zise ní ndaa 'bi ené lá dụú gi ro ɳgúngu ledre Kírésìto Yésu wá, kpá gi ro zise 'dó'dóse mi'dó'dó gi ro ledre ené. ³⁰ Togú 'dó'dósé yá, má'dó'dó koo kpá kenée, ndéréóguné gi karaba ní mááyí aka kpá fú 'dó'dó gi ro moko 'bi Kírésìto.

2

Ídise 'bó'bu rosé káa zí 'bi Yésu ní

¹ Owú 'bi Babá e, káa zí bi áse go kịé'do kí Kírésìto gi zí keyi née zía óto 'búse zía ndịsịné sáká sée simi ledre e ní, kpá káa zí bi áse go kịé'do kí 'Dówú Lomo, ndịsị go í'bí roko'bu zise zí lerí lafúse ndịsịné méngi sée kíngaya ní. ² Káa zí

bi goó kenée ní, máíli ídíse ndịsị kí mimbé'desé mbá kíé'do kí 'bú lafúse dosé. Togú máúwú go kídí ásé go ndịsị méngị ledre ga gére née kenée yá, mááyí ídí kíse kí rokinyi kíngaya. ³ Ndásé óto rosé káa zí éyí bi rómosé go do 'yị e mbá ní wá. Ídíse 'bó'bú rosé mi'búó'bú. Ledre lafúse ídí ídí zíse owóowó rómo do ledresé. ⁴ Ndásé ndịsị sómú lá duụ ledresé wá, ídíse kpá ndịsị sómú ledre lafúse zíse ndịsịsé sáká yée.

⁵ Misómú ledre esé ídí ídí mbá bilámáne kpá cé káa zí 'bi Kírésìto Yésu ní.

⁶ Tí bi Yésu ma'dáa ni ma'díi Lomo ní,
tí lá ili ené óto roné zí 'yị e owóowó káa zí
Lomo wá.

⁷ Ootomo roné zía óguné do sogo kángá
káa do 'yịma'dí ídíne
káa zí owúkúlú ní.

⁸ 'Búó'bú roné mi'búó'bú zí Lomo,
zía ótoómo roné zí umbu,
do phéphé wo do mingbúngbu kágá káa zí
'yị lúyú ledre ní.

⁹ Gí zía bi uwú kúrú Lomo ní, zí Lomo óto
ledrea owóowó rómo do 'bi 'yịma'dí e kí
maláyika e komo ere mbá.
Gí zí kényi née zía ídíne kí úndruné kíngaya
rómo do éyí e za mbá.

¹⁰ Káa zí bi ledre ni goó gí ro Yésu kenée ní,
'yịma'dí e,
yée ga bi niyí aka trịdri kí yée ga bi uyuní go
ní, kí maláyika e komo ere kpá mbá, niyí
inyi mbá óto úndru Yésu,

11 niyí ìnyì kpá mbá ndìṣì úku ledre kí tarayé kídí ma'díí Kírésìto Yésù nì Ngére.
Gì zì kényì née ní, zì ìrì 'Buzé Lomo ídíne mikófóne kíngaya.

Miméngì ledre esé idí 'dí'biógù 'yì e zì Yésù

12 Owú bì Babá e, máówo bú bilámáne kídí 'dí'bisé kóo sílìse go ro ledre 'bì Lomo kíngaya simì bì kóo mááyí dongarásé ìrì ní. Abú cak-aba mándá dongarásé ìrì wá, ídìse nda méngì ledre 'bì Lomo kíngaya rómoné mìrómo kí óto úndrua. Nì óto 'Buzé Lomo zía ídíne kí rokinyi karanée zía í'bí trìdrì bì za fí ní zíse. ¹³ Káa zì bì Lomo iline ídísé ndìṣì méngì éyì ga bì ili yée ní, nì í'bí roko'bu zíse gì royé.

14 Ndásé ndìṣì méngì moko 'bì Lomo kí mǎngúngúrú ledre e dongarásé kpá kí ndìṣì ítí kangú wá, ¹⁵ ídísé ndìṣì méngì bilámá ledre gì zì 'yì ga bì asiní gì ro ledre 'bì Lomo ásé dongaráye ìrì née, kí lúrúndíki lúyú ledre rosé gì zía ásé zíye go bimióngó, ¹⁶ gì zía lánýásé go ro 'dódo ledre bì ndìṣì í'bí trìdrì zì 'yì e ní. Ídísé ndìṣì méngì ledre e kenée, gì ro zíma ídíma kí mongú rokinyi simì bì karanée Kírésìto Yésù nì ndá'baógù ní, káa bì kúrú moko bì mándìṣì méngì a dongarásé ní nì ndéré lá gbékpíne ke. ¹⁷ Togú ngúnṣusé ledre Kírésìto go yá, kídí í'bisé née go rosé káa do 'dáná éyì zì Lomo. Abú ufuní máa ndotó, née mbá yata 'do'dó bì ndìṣìsé ndíki a gì ro ledre Kírésìto ní. Nì óto máa zíma ídíma kí rokinyi gì zía máúyu née gì ro moko 'bì

Kírésìto ma'dáa. ¹⁸ Bi ndaá kpá sínyí rosé wá, idízé ídí kése mbá kí rokinyi.

Ledre gị ro Timatíyo

¹⁹ Togú Ngére Yésu nṅunṅu zíma yá, mááyí kása Timatíyo zíse íri do sílí ga ba gị ro zía ndá'baóṅuné úku yéme ledre ga bi gị do bisé íri ní zíma gị ro zí mimbé'demá ìdrìne. ²⁰ Nì yáa kí ledresé kíngaya. Ngíti 'yì bì máówo yáa káa zía ní ndaá. ²¹ Lúrúsé aka, tú'dú 'yì e somúní eyé ledre lafúye 'yì ga bi 'bì Kírésìto Yésu ní wá, ndìshìní somú yì eyé ledreyé kíngaya. ²² Tí lá nì go miówoné Timatíyo nì go bilámá 'yì 'bì Yésu. Ndìshì sáká máa yáa ne kí moko 'bì úku bilámá ledre 'bì Kírésìto káa zí owú bì ndìshì sáká 'buné kí moko ní. ²³ Másómú nìyí 'dècì ngbangamá do sílí ga ba. Ledre bì nìyí úku a gị do bimá ní mááyí kása Timatíyo kíe zíse íri gị ro zíse ówo a. ²⁴ Máówo go bilámáne kí roko'bù 'bì Ngére Yésu, mááyí óṅu lúru sée.

Páwulo mbofo Epáfaradíta

²⁵ Másómú nì miútúásáne zíma aka nda mbú kásalúgu lúndumá sìmì Lomo Epáfaradíta zíse íri. Nì bilámá 'yì moko káa zí asikíri bì kóo kásasé wo gị ro zía óṅuné sáká máa ní, saká máa go do bilámá mìsì'dì. ²⁶ Ili ndéré lúru sée gị zía 'búse ndìshì go mēngì wo kíngaya. Zía ídìne kpá kí mongú sómú ledre gị do kací mongú ndíyá kóo mēngì wo zíse úwú ledre a kíe ní. ²⁷ Ma'díi, ndíyá nēe mēngì kóo wo go kíngaya Lomo saká kóo wo lá ne. Lomo saká ené nēe kóo lá dujú wo wá, saká nēe kóo kpá máa gị zía lerí nì

kóo méngì máa gì do kací a kíngaya. ²⁸ Utúásá mǎútúásá zía aka kpá ndá'bané gì zise íri gì ro zise lúrú wo zise ídise kpá kí rokinyi káa zí máa ní. ²⁹ Ídísé 'dí'bi wo simi sùmù zise óto úndru a gì zía ndìsì méngì moko 'bi Ngére Yésu, zise ndìsìsè kpá óto úndru ngíti géyì 'yì ga bi káa zía née ní. ³⁰ Ma'díi, Epáfaradíta i'bí kóo roné go zí umbu gì ro moko 'bi Kírésìto káa zí bi kóo ogu gì ro ndìsì sáká máa ní gì zía ndásé yáa wá.

3

Owo Kírésìto ni bilámá ledre

¹ Owù 'bi Babá e, máútúásá 'dó'dó kí úku ándá ledre ga ba zise wá, máíli zise ídise kí rokinyi gì zía ásé go 'yì ga bi 'bi Ngére Yésu ní. Ledre bi mááyí úku a ba ni sáká sée.

² Komosé idí idí rosé gì zí 'yì ga bi ndìsìní lóndo 'yì e kí úku ledre kídí 'búó togù 'yì utú ngbuṛu kí ni fú útúásá káa do 'yì 'bi Kírésìto ní. ³ Azé yì ezé go ze mbigí 'yì ga bi 'bi Kírésìto ní, togù utúzé go ngbuṛu togù utúzé wá. 'Dówù Lomo i'bí roko'bu ne zize ndìsìzé óto úndru Ngére Yésu kíe. Mbofozé ezé rozé gì zí éyì ga bi ndìsìzé méngì yée ní wá. ⁴ Idí kóo míméngì ledre kací ondù 'bi Yúda e i'bí tridri zí 'yì e bo yá, káa bi ledrea ni kóo idí zíma owóowó rómo 'bi ngíti géyì 'yì e mbá. ⁵ Mááyí ba mbigí Ébere 'yì 'bi Isiréle gì simi kúfú Benzemúna. Simi bi kóo arání máa ní, zíma méngimá sǐlǐ ìnyì doa ota do ónzó máa ngbuṛu káa zí bi kóo Músa eké káa do lorù ní. Ledre lorù née ni kóo zíma owóowó gì

zía bi mááyí Farusáyo ní. ⁶ Gi zí kényi née, zíma kóo í'bí romá ndịsị 'dó'do 'yị ga bi 'bi Ngére Yésu ní kíngaya, gi ro do ówo a kídí má'dí'bi sịlịma go ro lorụ née kíngaya. Gi zí kényi née lafúma e utúasání kóo lúrúndíkí lúyú ledre romá wá.

⁷ Gi zía bi máówo nda ma'díi ledre 'bi Kírésìto Yésu go ní, ledre ga bi kóo 'bi ondu ní, moko ndaá 'bi ené lolu simiyé zíma wá. ⁸ Bi ba ní, ledre ga bi kóo mándịsị sómụ yée kí méngị yée ní mbá, ma'díi moko ndaá 'bi ené kóo simiyé wá, máúçúóyó yée gi do sịlịma go mbá gi ro zíma 'dí'bi Ngére Yésu kí sịlịma sokó (10). Odu ma'díi ledre ni dujú ówo Kírésìto bi ni Ngére amá ní. ⁹ Née éyị bi oto máa zíma útúasáma kací komo Lomo gi zía káa do mbigí 'yị ené ní. Ndaá 'bi ené gi zía bi má'dí'bi ledre lorụ kíngaya ní wá, yị ené gi zía bi mángúngu ledre Kírésìto ní. ¹⁰ Máílì ówoyéme wo bilámáne. Lomo í'bí kóo roko'bu zía úrúne gi simi umbu. Idí kpá í'bí roko'bu máa née zíma gi ro tóromá ngbúó simi 'do'dó gi zí umbu ógundíkí máa kpá káa zí 'bi Yésu ma'dáa ní, ¹¹ gi ro togú máúyu go yá, zíma kpá úrúma káa zí bi kóo Yésu ma'dáa urú ní.

Í'bí ro'yị kíngaya zí Yésu

¹² Ndaá 'bi ené bi ya máméngị ledre ga gére née go mbá ní wá. Mándịsị méngị moko kí roko'bumá mbá gi ro zía ídine káa zí bi Kírésìto Yésu ilí zíma méngị a ní. ¹³ Owú 'bi Babá e, ma'díi máméngị ógu aka amá moko ma'dáa gi do oduné wá, éyị bi máówo ní, máótoómo ledre ga bi kóo mándịsị méngị yée ní go mbá

'dá'ba, máóto nda komomá go lá dujú ro ledre bi do'dónomá ní. ¹⁴ Máí'bí romá méngi moko 'bi Kírésito Yésu kí roko'buná mbá gi ro tákpásílí bi komo ere gi zí Lomo kí Kírésito ní zíma ndíki a.

¹⁵ Zée ga bi kése komozé enzi go simi moko 'bi Kírésito ní, sómú ledre káa zí ga gére née idí idí simi dozé. Togú misómú ledre 'bi ngíti 'yi ni kpí yá, Lomo ni 'dódo ma'díi zía. ¹⁶ Zíze lánýáze ro ledre 'bi Kírésito kíngaya rómoné mirómo.

¹⁷ Owú 'bi Babá e, ili idísé ñnyi mbá í'bí rosé méngi moko ma'dáa káa zí bi mándisi méngi a ní. Zíse kpá ndísisé méngi lódú kací yée ga bi kóo 'dodozé ledre ma'dáa zíye 'dá'dá ní. ¹⁸ Máúku kóo ledre ba go zíse 'dá'dá. Mángúngú romá zíse kí iní komomá, idísé 'bá'bá rosé gi zí 'yi lónodo 'yi e. Otoní royé go káa do okó ro Kírésito bi uyu do mingbúngbu kágá ní. ¹⁹ 'Yi ga gére née Lomo ni karanée 'dó'do yée bisinyíne. Ledre ga bi royé ili ní, ni yi ené zíye go lomo eyé. Ledre ga bi 'bi dokuwu ní, bi ndisi éme ené royé gi zía miéme. Mongú sómú ledre eyé ni yi ené gi ro éyi ga bi 'bi do sogo kángá ba. ²⁰ Azé 'bi ezé yi ezé 'yi ga bi 'bi komo ere ní. Ndísizé yi ezé ba sngó mindá'baógu 'Yi yómo zée, bi ni Kírésito Yésu Ngére ezé ní. ²¹ Ni ndá'baógu kí mongú roko'buné bi ni idí do éyi e mbá ní, zía óyóló'bó kuru'buzé káa zí ne ní, uyuzé lolu wá.

4

Idísé kpá fú 'dí'bi sílise ngbúo ro ledre 'bi Lomo

¹ Owú 'bi Babá e simi Lomo, ledresé ndịsị ówo romá gị zía máóto 'búse go kóngaya. Ngére Yésu idí í'bí roko'bu zise gị ro zise tórosé ngbúó simi moko ené. Máówo go kídí karanée Yésu ni mbófo máa gị rosé. Mááyí kí rokinyi gị zise.

² Kará ga gére née, Ewudíya kí Sitíke idíní nda mu ndịsị kí mimbé'deyé kǐé'do gị zía niyí go 'yị ga bi 'bi Ngére Yésu ní. ³ Yị lúndumá simi Lomo, idí sáká kará ga gére née, i'bíní kóo royé go ndịsị sáká máa simi moko 'bi Kírésìto. Ídí sáká yée idíní ndịsị bilámáye kí mimbé'deyé kǐé'do. Kará ga gére née ndro kí Kelémeniti kpá kí ngíti géyí 'yị e, niyí ye 'yị ga bi ndịsịní sáká máa kóngaya simi moko 'bi úku bilámá ledre 'bi Ngére Yésu zí 'yị e ní. Ga gére née go 'yị ga bi ìrìyé ni go miékéne simi búkụ 'bi trịdrị ní.

⁴ Gị zía bi ásé go 'yị ga bi 'bi Ngére Yésu ní, kací kadra mbá ídísé ídí kí rokinyi. Mááyí kpá úku ándá a, ídísé ídí kí rokinyi. ⁵ Kací kadra mbá ídísé ídí kí bikìdrị mimbé'de zí 'yị e za mbá. Gị zía sịndị kadra ni go gbóo gị ro zí Ngére Yésu ndá'baoguné. ⁶ Mimbé'desé nda ndịsị ídí kpụkpụkpụ gị ro éyí ga bi 'bi sága ba wá. Éyí ga bi ílisé yée ní, ídísé úku ledreyé zí Lomo, ni í'bí yée zise. Zise í'bí mbófo éyí zía gị ro éyí ga bi mengi yée go zise ní. ⁷ Togú méngisé kéyí go kenée yá, Lomo ni 'dí'bióyó mimbé'de bi kpụkpụkpụ gị ro éyí ní gị simisé 'dá'ba, zía í'bí mongú simikụtu zise gị zía ásé go 'yị ga bi 'bi Kírésìto Yésu ní.

⁸ Owú 'bi Babá e simi Lomo, ngíti yata ledre ni

ba máili kpá úku a zise. Ídísé óto mimbé'desé òwú gí ro ledre 'bì Lomo, gí ro ledre bì nì óto 'yì e zìye óto úndrusé gí zía ní, gí ro ledre bì utúasá miútúásá ní, gí ro bilámá miméngì ledre, gí ro ledre bì 'yì e iliní ní, gí ro ledre bì utúasá kací komo 'yì e mbá miútúásá ní, gí ro ledre bì nì bilámáne ní, nda kí ledre bì niyí mbófo sée gí zía mimbófo ní. ⁹ Ówosé ledre ga bì kóo má'dódo yée zise ní go, úwúsé kpá yée ga bì kóo máúku yée zise ní go, nda kí yée ga bì lúrúsé máa cù kí komosé kí méngì yée ní, ídísé ndìsì méngì yée kpá kenée. Lomo 'yì í'bì bikìdrì zì 'yì e nì sáká sée.

Páwulo mbofo 'yì 'bì Phîlípoyì e

¹⁰ Mbófo éyì zì Ngére Yésu gí ro ngíti sáká éyì bì méngì ándásé zíma ní. Tónósé kóo íci rosé gí ro sáká ándá máa go 'desì, tí lá mìsì'dì ndaá kóo zise wá ne. ¹¹ Máúku amá ledre née gí zía bì mááyí do lerì ní wá, máówo yì amá kací ídí kí rokinyi kí owú éyì bú. ¹² Togù tú'dù éyì niyí bo zíma, togù mbú cúku'dée yá, máówo yì amá kací ídí kí rokinyi kíe bú. ¹³ Ngére Yésu ndìsì í'bì roko'bu zíma ne simi ledre e za mbá.

¹⁴ Abú kenée ndotó, mámbófo sée go gí zía í'bísé rosé sáká máa simi sìnđì kadra 'bì lerì. ¹⁵ Sée 'yì ga bì 'bì Phîlípoyì, simi bì kóo ngúngusé aka ledre 'bì Kírésìto mikándané ní, sákásé kóo máa òwú se simi bì kóo máínyì gí simi kàngá esé Mekedoníya ní. ¹⁶ Ndaá kpá lá òwú wo née wá, kpá simi bì kóo mááyí simi gara bì Tasaloníka ní, sáká ándásé kóo máa go misáká ándá simi

bi mááyí do lerí ní. ¹⁷ Máúku amá nées gi zía bi máíli gága sée gi ro sáká éyí ní wá, yí ené Lomo idí méngi bilámá ledre zise gi zí sáká éyí bi ndísisé méngi a zíma ní. ¹⁸ Éyí ga bi kásasé sáká máa kée do sílì lúnduzé simi Lomo Epáfaradíta ní, mándíki yée go mbá, utúasání go miútúásá. Lomo ni kí mongú rokinyi gi royé gi zía niyí káa zí bilámá 'dáná éyí ní. ¹⁹ 'Buzé Lomo bi ni mǐngí éyí e mbá, ni í'bí éyí ga bi za mbá ílisé yée ní zise gi zía ásé go 'yí ga bi 'bi Owú 'bi ené Kírésito Yésu ní. ²⁰ Idízé ndísi kófó ịrị 'Buzé Lomo kací kadra za mbá. Idí kenée.

Mandá gi zí Páwulo e kí lafúne

²¹ Mandá zise íri za mbá. 'Yí ga bi 'bi Kírésito Yésu azé kéye yáa ní, i'bíní mandá zise íri kpá za mbá. ²² 'Yí ga bi 'bi Kírésito simi Róma yáa ní mbá, kíngaya yée ga bi ndísiní méngi moko 'be 'bi Káyísara ngére 'bi Róma ní, i'bíní mandá zise íri kíngaya. ²³ Kírésito Yésu Ngére ezé idí méngi bilámá ledre zise gi do bi zise ndísisé bilámáse. Idí kenée.

MIKÁNDA LORU 'BI LOMO KÍ DOSÍ ÉYÍ E
Baka: MIKÁNDA LORU 'BI LOMO KÍ DOSÍ ÉYÍ E New
Testament+

copyright © 2016 Wycliffe Bible Translators, Inc.

Language: Baka

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

9ebc1b62-650d-5302-9391-27a31d140102